

袖珍
小說

狡

兔

窟

上海
商務印書館

狡兔窟目錄

- | | |
|-----|------|
| 第一章 | 舞蹈相仇 |
| 第二章 | 酒肆密談 |
| 第三章 | 詭謀得售 |
| 第四章 | 幽窟容身 |
| 第五章 | 探蹤未遂 |
| 第六章 | 中途疑遇 |
| 第七章 | 故示端倪 |
| 第八章 | 大肆劇爭 |
| 第九章 | 世界奇刑 |

狡兔窟

目錄

一



狡兔窟 目錄

第十章 以僞亂真

第十一章 禍福變更

第十二章 重臨幽窟

第十三章 匪衆成禽

偵探
小說

狡兔窟

第一章 舞蹈相仇

美國歪俄明省之隆道村有名皮虎佛者。向開一酒肆。肆即從其村名。謂之隆道酒肆。肆中別無他夥。鉅細事悉掌諸皮虎佛一人。一日偶與其徒聚談。論及美國人民富庶。咸得自由。獲享無窮之幸福。且無論貧賤。均有被舉爲伯里璽天德之希望。言次。抵掌於几。向衆曰。諸君。美國行省雖多。而吾儕所居。則惟此歪俄明一省。此處……言猶未畢。旁有一排愛區牛公司總理名戈利者。適欲運牛往施嘎哥地方。道出此間。亦預於座。聞皮虎佛之言。卽僂言曰。此地人民。萬有不齊。得享自由之權利者。居於斯。不脫奴隸之性質者。亦居於

斯皮虎佛乎。君今所言。足令聞者歡悅。僕欲與君倒酒痛飲。使君談興勃發。議論益高。何如。卽顧謂鄰近多數人曰。盍赴飲乎。衆人聞言。遂亦不贊一辭。紛然入座。開懷大飲。蓋此歪俄明之俗。不尙浮文。承人招飲。不得稍有推辭。人民皆有尙武之精神。立身之道。苟能槍法完美。卽足動人敬慕。衆人正在隆道肆中酣飲。忽有一人突至門前。大聲曰。諸君能許我共飲否。衆人聞言。皇然回顧。見此人已自外而入。雖胸肩開展。修短合度。而塵污徧體。目帶灰色。足踏黃皮鞋。衣服絕類村夫。察其狀。恍若傭於牛公司者。其所著之褶衣。則以藍色法蘭絨爲之。兩袖高捲。手腕畢露。右腕套一兔皮圈。股旁徧懸銅帽。纍纍若貫珠。槍囊橫於腰際。中儲手槍。囊間有一皮

帶。直曳至踝。似此修飾。苟入乎素居亞東者之目中。固亦不足爲異。而當時隆道村中之人。則皆瞠目注視。竊以爲奇。蓋美人於負槍之處。大有區別。若欲抵制至危險之事。槍囊纔懸腰際。取其出之較便。皮虎佛與衆人注目良久。始謂之曰。此間定有條例。凡未明斯人之底蘊者。概不得共坐而飲。惟今日之酒。實以互相忻悅。則亦不必過以常例相拘。此人遂徐徐坐下。獻酬交錯。歡洽異常。快飲多時。此人於懷中取一鹿皮囊在手。意似欲償其值者。皮虎佛止之曰。飲歡樂之酒。例不取值。惟不識君作客於斯者。已幾閱月矣。其人曰。僅一星期耳。君豈能識僕非歪俄明之人乎。皮虎佛又諦視不置。尙未及答。戈利搨卽曰。雖不敢必君非歪俄明產。但與僕未

必志同道合。君其牧羊者乎。按美國境內。牛羊不共牧。羊所就食之地。縱碧草離離。牛不過食。以故彼往此來。彼來此往。積之既久。不免始而爭競。繼而齟齬。終遂至於毆鬪者。往往而然。戈利禡之問。固非無意。其人聞言。莞爾而笑。搖首曰否。僕因訪友至此。坐中忽有一人。指其槍囊而言曰。君既訪友而來。曷爲戒嚴若此。其人未及置答。皮虎佛又曰。客乎。君之貌似曾相識。未知前此亦曾至此否也。其人曰。僕恰似重來此地。但君之識僕。恐或於某招紙上見之。亦未可知。皮虎佛搔首曰。誠是。憶曾識之於某藥招紙。君其明榮醫生乎。其人曰。否否。僕名卡忒。皮虎佛曰。是矣。丸散中有名卡忒肝氣丸者。其殆君之所製乎。但居於斯者。祇知暢飲杯中物。以故愁

城盡破。脈絡灌輸。患肝疾者。百無一人。是君之丸不行於歪俄明也。明矣。君今至此。復有何事。坐中又有一人。語含譏諷。謂卡忒曰。君醫生乎。恐亦未是斲輪老手也。言未既。瞥見一人昂然直入。雙目炯炯。狀至險詐。既入室。逕至櫃前。手撫槍囊。身倚其上。此人乃美國著名棍徒之魁首。名楷達。嘗盜人牛羊。此事按之美國律法。罪當死。顧人雖知之。莫敢誰何。蓋楷達狡詐百出。羽翼衆多。稍撓其怒。卽爲所噬。是以道路側目。悉將除暴之責。舍己而期之於人。迨其後果有一人設計圖之。不期事尙未成。身先被殺。於是衆鑒於斯。見之益益畏懼。咸相戒弗敢動。當日隆道肆中諸人。見其貿然而來。皆相顧錯愕。祇得起立以俟之。楷達向衆人略一點首。曰。

汝等頃所言不相識之人安在。可速標而出諸門外。俾不至爲所擾亂。言訖。以目四顧。故若未見卡忒。欲得而與之嬉戲者。卡忒意氣自若。其於楷達猗初入之時。面已露出驕容。不啻蜘蛛覩蒼蠅之入其網中。傲然自得。楷達猗乃向卡忒諦視半晌。謂皮虎佛曰。君其能戲之乎。言次。將手槍之火機略撥。卽聞砉然一聲。火星四裂。其彈不卽不離。射於卡忒左足之側。謂卡忒曰。速起跳舞。以供衆覽。卡忒問曰。胡爲而欲我跳舞。楷達猗聞言。舉槍一指。機又猝發。正中卡忒右足之旁。將地板擊成巨穴。烈焰併起。幾及卡忒之面。厲聲叱之曰。我在此間。言出必行。舉無敢忤我者。旣命跳舞。汝卽跳舞可耳。喋喋何爲。卡忒向楷達猗所持之槍。斜眸一睨。卽脫帽置座。

據地大舞。體輕而健。旋轉如風。觀者莫不爲之歎美。鼓掌如雷。楷達猗忽。又以槍擊地。向卡忒曰。失之太緩。卡忒聞言。旋舞益急。手足靈妙。不啻振翼天衢。正跳舞間。忽若失足一絆。遽爾倒地。觀者爲之哄堂。楷達猗亦置槍囊中。以手擊股。大聲劇笑。笑未已。猛回首一顧。倏覺卡忒自地躍起。鵠立胸前。突舉槍作欲擊狀。怒目疾喝曰。汝亦起舞以相酬。不爾。我將擊汝。楷達猗遭此強迫。實爲創舉。旁觀者見其受辱。皆含笑而莫敢發聲。誠恐肆意一笑。楷達猗或變羞成怒。波累將及。當時楷達猗聞言。雖以奉令爲羞。然已實逼處此。無計可解。遂略作嗽聲。強自步至中央。縱身而舞。惟楷達猗身軀肥胖。輾轉不靈。曾未幾時。額際已淫淫汗下。皮虎佛默觀良久。不

禁啞然失笑。約越三十分鐘。卡忒大聲曰。止。今日我之所以誨汝者。汝其誌之。苟不欲人施以不甘受之事。卽不當以不甘受之事施之於人。理之所在。從古如斯。不能稍易也。楷達辯面壁言曰。我豈忘之。汝今設此詭計。使我一時未及措手。墮汝計中。但一之爲甚。其能再乎。此後汝其自慎。卡忒曰。我意未必後遇無期。且我今此來。詎惟作無謂之盤遊。卽我之槍法。亦未嘗稍遜於汝也。此時楷達辯已徐行向外。身倚闔闌之間。忽聞腦後槍聲大震。彈如暴雨之驟至。不偏乎左。不越乎右。一一從楷達辯耳旁飛掣而過。未幾。槍聲旣絕。楷達辯倏已不見。而門上倚立之痕。宛然可見。蓋環其三面。彈如棋布。而中空一人許。絕無彈痕。戈利辯歎曰。壯哉卡君。神乎。

技矣。皮虎佛曰。楷達猗爲人險詐。今雖犯而不較。恐有後圖。卡忒君乎。槍法雖佳。其必慎之母忽。

第二章 酒肆密談

卡忒問皮虎佛曰。楷達猗自居此處。已歷幾時。皮虎佛答曰。約已蟾圓六度。惟甚不洽於輿情。深望其早赴黃泉。或者卽離茲土。不致被其所凌暴。君前此豈亦曾與之相遇乎。卡忒曰。然。頃所言欲訪之友。卽此人也。語頃。排愛區牛公司中諸人。均已紛然各散。肆中惟皮虎佛與卡忒二人相對而已。皮虎佛搔首思索。注目良久。忽以手擊股。大笑而起曰。卡忒君乎。尊顏我已辨別。言至此。又低聲曰。前言誑僕耳。君非醫生。雖名卡忒。但其上尙少一尼字。君其然乎。果爾。請自今與君

相友言畢。重欲與卡忒握手爲歡。狀極莊敬。卡忒引睇移時。卽伸手緊握皮虎佛之臂。皮虎佛覺痛甚。然亦未形於色。而身恰不覺因之欹側。卡忒曰。誠如君言。僕知君非常誠謹。所事不妨直告。賤名君自知之。勿爲外人道也。皮虎佛曰。僕在此間。頗得多數人之信服。卽有流露。亦屬無妨。況僕出言審慎。斷不致遽以所知者告人。今與君無心邂逅。令人相見恨晚。君雖將我手力握。五指間餘痛猶留。但旣一往情深。亦可置諸度外。尼卡忒微哂曰。友生握手言歡。奚有於是。僕所以至此之故。今當爲君陳之。紐約有馬炳擲者。豪富之名。振於全國。聞在此一星期內。擬欲遊畋於歪俄明。以相娛樂。吾探知爲彼鄉導者。卽楷達。嚮其人。不識確如所聞否。皮虎佛曰。

有之。數日前楷達齋來此小飲。比及酩酊之際。揚揚自得。大肆矜誇。自言彼於紐約得一佳遇。卽導引馬炳擲至此。彼楷達齋於下流社會中。極有勢力。且到此縱纜及半載。而路已一覽無餘。鄉導之任。固所優爲。特不知其何由而得之。尼卡忒曰。彼生長於波斯盾地方。後以仇視者衆。不遑甯處。遂甘作江湖之散人。厥後又曾居紐約。其勢力亦復不小。蓋以上等社會中人。有時思遂其私欲。楷達齋每能出其奇計。以輔助之。以故深得彼輩之心。而其勢力亦因之以膨脹。皮虎佛君乎。汝究屬於何黨。皮虎佛曰。我屬於民政黨。但政治界上。僕亦未遑致意研究。因鄙意以爲被舉爲伯里璽天德者。無論隸於何黨。總當事之以禮。尼卡忒曰。尊意適與僕合。誠不

愧爲我美之良民。皮虎佛問曰。君之欲訪楷達禡也。意固安屬。尼卡忒曰。非他。因聞此間有多數匪徒。專俟馬炳擲之來。將設計陷之以勒贖。楷達禡所以爲作鄉導者。亦思達該匪徒之目的而已。皮虎佛且驚且怒曰。計陷勒贖。楷達禡時有所爲。但豪富如馬炳擲其人。其權力之大可想。彼何所恃而敢出於此。況此村俗甚善良。豈可任此不法之徒。恣意妄爲。而爲所波累。僕不如先事力圖之。言訖。持槍欲出。尼卡忒急握其手。從容而言曰。倘僅僅爲彼一人。則僕前此已早除之。第彼不過爲多數匪徒之傀儡而已。縱殺其身。於事何裨。而此多數之匪徒。反得以逍遙網外矣。我今密爲查察。必欲一網打盡之。彼楷達禡近居何處。君必知之。請明以告我。皮虎

佛曰。彼所居之穴。甚不易知。此地居民。亦以被竊之牛羊甚夥。料其必與身同匿。以故欲偵得其巢穴所在。心亦甚殷。但僅知其托跡於對岸深山之中。而行蹤詭祕。令人莫測。且羽翼甚衆。誰敢貿然迹之。入此虎穴。尼卡忒微笑曰。我欲迹之。皮虎佛曰。不可。無論此去未必能見。卽見矣。而楷達穉勇藝絕倫。加以徒屬之衆。亦非君一人所能敵。俟僕囑付多人。與君偕往。尼卡忒曰。承君關切。銘感不忘。但僕凡有所爲。未嘗與人合力。此後僕欲僑寓於茲。而蹤跡楷達穉時。不能多所攜帶。尙有箱籠一具。略遲片刻。當自車站運至此間。請君代爲收領。設當衆人之前。則我當僞託爲特克撒之牧牛者。來此欲購新地。以爲畜養之需。而頃間所言。出僕之口。入君之

耳。請勿爲他人道也。皮虎佛曰。將來馬炳擲到此。或竟爲所誘。將若之何。尼卡忒曰。此乃僕之責任。與君無涉。君惟明以處事。慎以出言。卽遇異常驚懼之問題。亦靜以鎮之可也。皮虎佛曰。惟君影隻形單。入此虎狼之穴。未免行險僥倖。縱以君之能。或不至有意外之事。然倘須合羣力以爲之。則我當摩掌以待。尼卡忒曰。謝汝盛情。我心感甚。少時我卽命人將箱籠送來也。自此尼卡忒遂僞作牧人。寓於隆道酒肆之內。夫以偵探而論。尼卡忒眞無愧爲庸中佼佼。鐵中錚錚者。蓋其料事甚神。勇敢莫匹。心細如髮。膽大於身。凡疑案之爲所偵獲者。不勝枚舉。以故自大西洋至太平洋。歷墨西哥海灣。至拉伯拉多。卽在婦孺莫不知之。而當時歪俄明地方。則除

皮虎佛以外。竟被隱飾。舉莫知其爲尼卡忒者。而尼卡忒則深知此多數匪徒。險惡殊常。其陷人之術。非公然自逞於廣衆之間。往往挾鬼蜮影射之技倆。使人受其害而猶不自知者。此次設計。欲誘馬炳擲之發起人。籍隸紐約。名麥哥倫。其居心之很毒。用計之陰祕。莫與比倫。眞小人之尤者。前時尼卡忒屢欲乘間拘之。治以壞法亂紀之罪。奈未得確據。此願久而未償。今楷達辯旣爲鄉導。與麥哥倫相狼狽。不可不急迹其所爲。遂以監察麥哥倫之責。責諸微爾基。而隻身馳往隆道。微爾基者。亦紐約著名之偵探也。二人雖知匪黨將行此計。至其中若何設施。則猶未深知其底蘊。所以尼卡忒離紐約時。曾囑微爾基以此事必須隱密。卽馬炳擲前亦不可

道及隻字。勿爲楷達辯等所覺。將作一網打盡之計。而爲社會除一大害。微爾基初意。本欲止尼卡忒之行。特以尼卡忒意甚堅決。且知其查訪精密。見微知著。此去自必得心應手。操匪類於掌握之中。故亦不甚相阻。但約之曰。此案日後或有變動。當以密電相告。由隆道酒肆轉交。二人遂握手而別。雖分道揚鑣。而各有專責。然尼卡忒此次之行。亦殊冒險之進取也。

第三章 詭謀得售

尼卡忒既將箱籠送交隆道。遂檢一明靜之室。坐臥其中。無何。室中忽有一身材適中之印第安人。髮長而黑。分繫兩旁。首戴舊帽。體裹氈毯。欻然自梯而下。足不成聲。直達酒室。維

時酒徒絕迹。皮虎佛手新聞紙。獨坐案側。印第安人步近其旁。率爾曰。君健乎。皮虎佛正目注於報。聞言不覺一驚。急擲去報紙。一手按槍。離坐厲聲而問曰。汝何人。來何事。胡爲條入我室。速言弗遲。印第安人意態從容。手指酒甌答曰。特來飲酒。皮虎佛將槍上舉。叱曰。此間乃白種之尊貴者所居。汝安得至此。且又乘我不備。擅進臥室。是何意見。可速言。勿謂我槍不利也。印第安人目視皮虎佛大笑不止。徐徐走近酒甌。以手握鼻曰。訪醫生耳。皮虎佛驚異曰。欲訪之醫生何名。印第安人曰。非他。卽製肝氣丸藥之尼卡忒。皮虎佛聞言。注視半晌。問曰。然則汝爲誰。來自何處。印第安人曰。我名隱披忒。自紐約至此。皮虎佛曰。此處並無尼卡忒其人。汝或有所

誤會。可向他處訪之。隱披忒曰。我知彼確在此處。相見之下。我將手刃之。皮虎佛雙目炯炯。直視隱披忒。少頃。將槍機略按。言曰。然則汝且稍坐。其人確在此間。彼之意亦正欲與汝謀面。但會晤之後。汝弗計脫。且我亦將磨厲以須。言畢。倉皇欲出。隱披忒忽嗤嗤不已。大變其音曰。皮虎佛乎。君可謂忠於人謀矣。機密之問題。明於心而不露於口。皮虎佛始恍然大悟。且喘且言曰。噫。尼卡忒君耶。汝何忽變爲印第安人。使我顛倒錯亂。一至於此。尼卡忒曰。請君見恕。僕特將鼻際裝高。兩頰敷以顏色。略如印第安人狀。聊以先試於君耳。君旣不能辨廬山之真面。則何慮不足以誑楷達猗乎。皮虎佛驚疑略定。又問曰。君之往見楷達猗。殆卽飾此以往歟。尼卡忒

曰。然。如此裝飾。雖未免露出野蠻之態。但亦不得不若是耳。皮虎佛曰。爲自衛之計。此去須佩手槍。鄙意與君偕行。庶免獨行踽踽。尼卡忒將氈毯棄去。示以所佩之手槍。且曰。僕所以不欲與君偕行者。固別有意在。君如在此。與僕更有所益。因他人與我之信。寄於此處。可以由君代收。語頃。忽聞馬蹄奔赴之聲。雜然而至。俄而人聲鼎沸。漸及門外。皮虎佛聞而惶惑。不敢出門。遂從窗隙一望。急向尼卡忒曰。君且緩出。楷達猗現領多人到此。料必欲復前讐。言未已。楷達猗以手執槍。後隨六七人。亦皆掣槍在手。自外逕入。瞠目四顧。問皮虎佛曰。前之醫生安在。我今特再來跳舞。以娛彼目。皮虎佛曰。彼早去矣。不知所往。楷達猗曰。此誑語耳。皮虎佛怒曰。汝何

由知我誑。汝既不信。當與汝挑身獨戰。言訖。挺身起。手按槍機。楷達齧急止之曰。此正不必。我未遑與汝決鬪。卽謂其所隨諸人曰。汝等可至彼臥室及各處搜尋。衆人領命。進內搜尋。維時尼卡忒默坐一隅。皮虎佛中心若杵。少頃。搜者俱無可獲。齊來覆命。楷達齧曰。彼或聞風而逸。亦未可知。皮虎佛曰。汝謂我誑。今竟何如。楷達齧曰。汝確未誑言。但自恨失之太晚。汝亦知彼將重臨此處乎。皮虎佛目視尼卡忒。尼卡忒點首示之。皮虎佛會意。卽曰。不出三日。彼將復來。楷達齧昂首一思。若信所言之非僞。轉身欲出。瞥見壁隅坐一印第安人。面目奇異。遂又駐足。問皮虎佛曰。面壁者何人。我知汝酒肆中。惟白種人時臨小飲。此人態度若此野蠻。何聽其據坐。

於斯。究屬何故。可速麾之出。尼卡忒徐徐起立。僞應曰。我所
以兀坐於斯者。因俟一友。其友乃白種人之表表者。名楷達
齋。楷達齋驟聆是言。目瞪心疑。不知所答。皇然曰。汝來何自。
尼卡忒曰。我自令聞廣譽之人處而來。其地則紐約也。楷達
齋未解所謂。問皮虎佛曰。彼何所言。皮虎佛曰。彼言來自紐
約最著名之人處。楷達齋遂握尼卡忒之手。走至一隅。耳語
曰。汝何名。所謂著名之人爲誰。尼卡忒答曰。我名隱披忒。夙
與麥哥倫友誼甚篤。計誘富人之事。亦所深知。故麥哥倫遣
我至此。楷達齋急曰。須低聲。汝臨行時。麥哥倫有無言語及
信件授汝。尼卡忒被其盤詰。辭意忽窮。因易辭以對曰。有。曾
囑轉達。彼與富人約三日內可至是處。蒙彼信任。囑先俟於

此間。俟彼來時。然後於彼汝之間。藉通聲氣。蓋我僑寓於斯。已歷多年。初不讓老馬之識途也。楷達禱默思移時。小語曰。言之真僞。我尙末由辨之。尼卡忒又言曰。我與麥哥倫相友善。今爲所遺。非第爲區區之財也。彼實允我此事若成。當酬以某銀行總理之職。且以素所愛慕之美妹思劣脫妻我。我故不憚勤勞。挺身而至。楷達禱曰。言雖近理。現亦不必空談。汝旣膺差遣。有無麥哥倫之的據。足使我深信不疑者。示我一二。蓋楷達禱爲至陰詭之人。每每推己及人。易滋疑竇。當時細加盤詰。幸尼卡忒善於應變。且逆知楷達禱之必不肯遽信。故未雨綢繆。前在臥室時。曾揣摩麥哥倫之筆法。謬作一條。是時聞楷達禱之言。遂從懷中取出。遞與楷達禱。其文

如下。(歪俄明楷達齋君鑒。來人隱披忒。吾所深信。且今此
之事。彼亦洞明於心。特先遣彼來前。將言面告。麥哥倫具。)
楷達齋取在手中。反覆詳閱。曰。字雖不甚相識。諒非偽造。既
若是。汝亦我之腹心。當速離是處。與我偕行。卽旋身謂皮虎
佛曰。此隱披忒君。前時曾相遇於牧場。略有半面之識。今欲
與其同往我處。小作勾留。約遲三日。再當來此。訪問刁詐之
醫生。汝不可將我意宣露於彼。設有洩言。致彼聞風而逸。匿
跡他方。則我惟爾是問。皮虎佛亦置不答。惟頻頻目視尼卡
忒。深佩其冒險之膽量。可謂極矣。尼卡忒遂與皮虎佛作別。
當尼卡忒正欲出隆道酒肆。忽電局內送一信來。賈信者曰
信係轉交尼卡忒收者。此間確有其人否。皮虎佛曰。有之。言

畢。將信取過。賈信者恩恩而去。楷達禱約略聞卡忒二字。遂又跂足。問曰。我知卡忒乃醫生之名。皮虎佛乎。比者汝不言。三日後醫生將復來此地乎。皮虎佛曰。然。楷達禱又言曰。信既轉交。可卽付我一閱。皮虎佛早料楷達禱有此一言。以故預掣槍於手。卽舉以指楷達禱之面。而言曰。自我設立酒肆。轉交之件。時有送來。此信既與卡忒。惟卡忒得以閱之。亦惟我得以收之。汝何人。妄思取閱。若必如此。吾惟與汝一決耳。楷達禱見皮虎佛大違己意。頗爲忿恨。特欲待時而動。故亦默然不語。少頃。謂所隨諸人曰。行矣。皮虎佛念適來之信。必有要言。而交之則不得其便。因謬向尼卡忒曰。頃飲之酒。值猶未償。何得遽去。尼卡忒默會其意。答曰。汝不必躁急。吾當

照償。言訖。趨至櫃前。取出皮囊。將錢付訖。皮虎佛乘其償值之時。卽將電信團成小球。納入尼卡忒之袖。尼卡忒遂與楷達齋等步出隆道。適楷達齋等車騎在前。尼卡忒獨乘一馬。因僞爲整鞍。以鞍自蔽。出電信竊視。此電信乃紐約微爾基所發。悉用密碼書成。其譯文如下。（馬炳擲禮拜五可來。麥哥倫與之偕行。）尼卡忒閱畢。遂撫鞍縱身而上。自語曰。事機之巧。乃至於此。我曾向楷達齋謬言。麥哥倫不日可到。今竟驗矣。雖然。若輩之詭計。亦勢將實行矣。

第四章 幽窟容身

楷達齋及其羽翼所居之巢穴。在隆道南河對岸。險固天成。足可匿跡。其形勢與達哥沓沙漠之地。初無異致。怪石矗立。

卽以善升石之山羊。亦不能攀援而上。其地徧生橡樹。彌望皆是。其他雜樹。殊不多覩。人若未逾河時。自遠眺之。不過一廣漠無垠之地耳。不知山窮水盡。別有一天。蓋循荒漠而前。有一童山。越此山約有二里許。又有一鎮。名銀嵌嫩。自銀嵌嫩而北。則漸入佳境矣。崇山峻嶺。土脈沃肥。初視之。幾若無路可通。迨旣入其處。則面環帶水。芳草離離。頑石四圍。堪蔽風雨。此中勝境。雖在歪俄明年老之人。亦聞所未聞。見所未見焉。而楷達禱之得此。其事甚奇。亦殊出諸意外者。一日楷達禱盜人之牛。爲追者所迫。恐遭拘獲。逾河越嶺而逃。正行間。不期有多數鄉人。自他路間行而至。將去途截住。楷達禱進退維谷。與其束身就縛。不如決一死鬪。鬪數合弗勝。則又

逃。循山徑屈曲而入。馬蹄忽蹶。倒於右手石壁之上。此石壁恍若門戶天開。身隨之進。舉目一觀。則大喜。天然成一藏身之窟穴。急閉其石門。隱身於內。自外視之。則儼然石壁也。追者至。忽失楷達禡所在。議論紛如。交相駭怪。楷達禡與追者祇隔石壁一層。默聽衆人嘩噪久之。各鳥獸散。楷達禡遂據以爲巢。招同黨共居其間。地旣幽僻。人更鮮有知者。遂不啻爲狡兔之窟焉。當日尼卡忒自離隆道。與楷達禡一路偕行。迨至進門以後。見是處非常險固。不免俯首沉思。自覺幽閉於內。欲逸無門。此來太自冒險。繼念身旣改裝。未必能辨其真僞。我祇見幾而作。或可於事有濟。亦未可知。以故驚駭之念。終不敵其好勝之心。遂亦坦然置之。然楷達禡性本善疑。

雖得麥哥倫之信。究未辨此中虛實。以神鬼不測之窟。貿然
導人至此。深恐因之顯露。適以啟外人查訪之漸。是以悔懼
交集者久之。尼卡忒入室後。漸見夕陽西下。暮色侵几。而窺
楷達禱之意。似不欲與已縱談計誘之事。已雖詐作局中。亦
不敢肆言無忌。深恐言多必失。真情或有破露。反爲不美。據
微爾基之信。馬炳擲禮拜五可來。距今尙有三日。此中情事。
正不難從容探察。此後微爾基未必有別情報告。身旣居此。
隆道酒肆中消息亦絕。尼卡忒默坐良久。猶未晚餐。頗覺不
耐。遂起而逡巡室外。見糧儲充足。形勢奇險。出入惟此一門。
旁有二人。荷戈而立。終日相守。不稍移易。察視多時。復轉步
入室。雖知境甚危險。亦不置懷。無何。晚餐已畢。窟中燈火。朗

若列星。尼卡忒遂倚燭而坐。手持印第安人之煙筒。獨自吸煙。自思若遇緩急。吾可立殺此監門者。而縱身先出。然後堵塞其門。則其黨雖衆。亦不能出吾掌握之中。矧吾知彼知己。防之較易。非若彼之視我。殊茫然弗之辨也。昏黃之際。安居無事。惟窺楷達辯之色。若禁其同黨。不得與己言論者。己遂亦緘默自安。但默揣其所以不與己言者。亦非必窺破真情。大約若輩出言審慎。固應爾爾。若果爲所窺破。則必立置諸死地。詎祇於不言。思至此。益作蠢頑之狀。一若忠厚可憫。與下愚之人無異者。迨夜漸深。衆皆身覆氈毯。席地而臥。須臾。鼻息如雷。惟監門之二人。則鵠立如故。略無倦意。尼卡忒雖獨清獨醒。第恐或滋疑竇。遂亦詐入睡鄉。斯時銀河耿耿。月

光如水。從山峯缺處射入。尼卡忒旋啓一目。竊視楷達猗。及其隊長薩板喬圍坐一處。俯首密談。因自忖曰。楷達猗視人如己。信者絕鮮。所信任者。惟薩板喬一人而已。今二人竊竊耳語。必有異常祕密之事。吾何不乘其未覺。屬耳聽之。遂徐徐從草地上。向二人所坐之處。蛇行而前。無何。相去已近。語雖未能了了。然已隱約可聽。但聞楷達猗謂薩板喬曰。我以此計授汝。馬炳擲不日將來。屆時我導彼遊畋。當徐徐引至銀嵌鎮之北。汝率多人。隱於此間。遙見馬炳擲之來。卽突出擒之。錮於窟中。吾則僞作驚逸狀。奔回隆道。言正與馬炳擲射飛逐走。道旁忽突出多人。持械而至。將馬炳擲劫去。聲言非得百萬金鎊。送至某處。不足以贖其身。吾卽奮力向前。

冀圖相救。奈衆寡不敵。身已受傷。祇得任其向墨西哥邊界逸去。吾見追之不及。因亦折回。然以受傷頗重。不能疾趨。故至此已距今三日。想匪黨亦必遠颺矣。如此報告於衆。必不我疑。而汝等將彼禁錮之後。可留監守數人。餘悉與汝追至隆道。謬如聞信。前來視我之疾。以破羣疑。示人以此事毫不關涉。而後我計乃畢。任彼四出密查。妙在穴窟天成。馬炳擲錮閉於內。非惟有險足恃。且人亦無從知之。待其金鎊悉數送來。乃以布蔽馬炳擲之目。仍送至童山沙漠之地。釋之使去。令彼來自何方。去自何地。皆茫乎無所知。則必未從踪跡矣。惟汝率衆往覘時。非改裝不可。卽不改裝。亦須戴假面具以掩之。而馬炳擲被獲之後。卽蔽其目。一切勿爲所見。斯二

者。尤爲最要之問題。汝其母忽。苟汝我均能各盡其責。則此事如掌上觀紋。殊甚易易。果得此百萬金鎊。則我取其半。以半酬汝與多數人之勞。決勿食言也。薩板喬曰。此計果妙。但麥哥倫至此。……言猶未畢。楷達禱忽以目四顧。曰。母高聲。恐屬垣有耳。薩板喬略一點首。低語問曰。麥哥倫至此。究因何事。楷達禱曰。彼或思與吾儕共圖此事。抑祇以伴送馬炳擲而來。孰是孰非。未能深悉。因彼祇囑隱披忒授我以至此之期也。薩板喬以刀畫地。若有所思。默然良久。始曰。隱披忒之爲人。狀殊險詐。吾深惡之。楷達禱曰。不然。吾觀其人頗誠實。於此間事。萬不至有所破壞。旣已來此。當姑留之。薩板喬又曰。吾審察其貌。眼帶灰色。絕異印第安人。楷達禱曰。恐汝

目力或有誤耳。否則似是而非。或者其種已易。亦未可知。惟據我視之。則鬚眉畢肖。況麥哥倫囑帶之字據。及其傳述之言。鑿鑿可據。似非僞飾。薩板喬聞言。仍若懷疑未釋者。楷達亦亦不與辨別。漸及他事。尼卡忒聽至此。自謂所聞已足。思欲仍返故處。方一躊躇間。孰意畧遲一步。幾罹不測之禍。斯時尼卡忒尙未動移。忽有暴厲之聲。自腦後而發。尼卡忒急屈伏如故。但聞一人厲聲曰。咄。汝敢擅自動移。膽過量矣。吾將擊殺汝。尼卡忒聞言大駭。急開目竊視。則見守門者已少一人。始恍然於前此惟注意於彼之所言。未遑兼顧。而守門者倏已自石邊至。致爲所見。惟事已至此。亦惟有將計就計。以毯覆首。仍僞作熟睡狀。此時楷達正正與薩板喬並坐相

語聞聲不覺一驚。各攜手槍而出。在楷達猗之意。幾疑手下或有謀叛之情。及見持槍者惟此一人。且槍口並未對己。心遂稍安。因問曰。何事。守門者答曰。隱披忒易其臥處。與二公相去匪遙。楷達猗聞言。即走近尼卡忒身旁。以足蹴之。見尼卡忒僵臥如故。鼻息曾不少減。楷達猗曰。彼正在睡中。遂問守門者曰。汝曾見彼之動移乎。是否匍匐而前。答曰。未見。我偶以事至此。則見其臥處已易耳。楷達猗疑訝久之。又將尼卡忒用力一蹴。尼卡忒忽一躍而起。掣刀於手。兩眼熒熒。大聲曰。蹴我者誰。我乃麥哥倫之友。何得輕視。楷薩二人。不料其突然躍起。見其鹵莽之狀。反覺一驚。爲之辟易。而尼卡忒覩其氣餒情形。心竊竊焉喜。少頃。楷達猗問尼卡忒曰。汝既

臥於彼處。何以一時忽在我旁。尼卡忒曰。我睡眠迷糊。亦不辨此爲何地。第因空曠之區。寒冷較甚。遂移臥於此處。沉沉睡去。正在酣睡之際。不知爲誰所蹴。夢魂致爲驚醒。楷達禱曰。此間達例。宵深之際。不得任意游行。汝雖爲麥哥倫之友。然既居此處。卽須守我規則。尼卡忒正待作答。忽聞門外似鶉啼之聲。至再至三。不絕於耳。衆皆側耳聽之。意若別有所屬。無何。楷達禱以手掩唇。亦效鶉聲以答之。旋謂衆曰。麥哥倫至矣。汝等速啟戶導之入。彼先期而來。必有他故。

第五章 探蹤未遂

維時尼卡忒驟聞楷達禱之言。惶駭異常。幾於手足無措。自思照微爾基所發之電。明明謂麥哥倫三日後方至此。何以

並不應期。已既僞爲麥哥倫之友。托言授信於楷達禱。而麥哥倫先期而來。與己言絕不相應。適以啟楷達禱之疑。無怪楷達禱自聞鶡聲。向己頻頻注視。轉瞬麥哥倫一入。事機立敗。且此地如此險阻。自一門通出入外。絕無他路。身既至此。則已入其勢力範圍之中。一經窺破。何以爲脫身計。躊躇至再。進退維谷。又見楷達禱目光灼灼。按槍而立。尼卡忒明知一時斷難自脫。遂將氈毯裹緊。一手按住槍機。鵠立以俟。惟自分雖欲出無自。而不可不力求出計。以徼倖於萬一。蓋前在隆道肆中。與楷達禱漸成怨恨。而於麥哥倫亦有釁端。相接之下。其危險殆不堪設想。惟凡事天定足以勝人。此時尼卡忒雖覺危險。恰又不盡如所料。未幾。有二人導麥哥倫入。

室。頭戴毡帽。壓於眉上。一身服飾。均係深黑色。尼卡忒雖與麥哥倫相識。而此時反覺模糊不辨。蓋前時並未有鬚。而今則徧於口際矣。楷達猗見麥哥倫至。急忙肅之入。就問曰。君所傳暗號。前曾相約。僕固未嘗一日忘。但君前言須禮拜五來此。距今尙有三日。僕故未遣人至隆道相俟。此路非常祕密。非外人所得而知。君從未一至此間。何以不藉導引。竟得達此。言時。疑懼之情。盡露於外。蓋彼以向之有恃而無恐者。惟以所居幽深僻遠。人莫之知耳。一旦爲人所知。則安樂之鄉。立成爲累卵之地。尙何足恃。初猶疑同黨之人。或於隆道與麥哥倫不期而遇。與之偕來。迨見麥哥倫隻身而入。並未

有導引之人。心中益驚疑不止。但聞麥哥倫答曰。奇矣。導我

者恰有一人問其里居。則曰隸於君處。楷達猗急問曰。然則此人安在。麥哥倫曰。據言承君之囑。常駐於歪俄明省。導我至此。我方舉作暗號。彼卽倏忽不見。未與入室。我方疑之。此人苟非君之所遣。則必係偵探無疑。楷達猗聞言。急傳集衆人。報名細點。點畢。面如土色。謂麥哥倫曰。所隸於吾者。盡在於斯。試問導君之人。其狀何若。麥哥倫亦驚異曰。其人貌極魁梧。我纔抵隆道。卽與彼遇。一見如舊相識。彼言此路奧祕。特奉楷達猗君之命。在此專司導引。問我何日啟行。當爲前導。彼時深歎君用意之周摯。而孰知其有大不然者。楷達猗曰。此事諸多費解。我所以未遣人相迓於隆道者。以接君來書。謂須禮拜五日至此。刻尙未及其時也。麥哥倫茫然不解。

問曰。送信者爲誰。楷達辯答曰。送信者。自言爲汝之至友。名隱披忒。楷達辯言至此。已悟受尼卡忒之欺。且未悉導麥哥倫之爲誰。怒懼交并。瞋目而視。若欲假尼卡忒以洩之。而尼卡忒聞其所答之言。明知事已決裂。於是振作精神。預爲對付之計。不料麥哥倫睜日向尼卡忒端詳一過。略一躊躇。忽轉謂楷達辯曰。隱披忒乎。吾確曾遣彼傳信於君。楷達辯驟聞是言。似頗疑訝。薩板喬亦默然不語。以刀入鞘。有頃。麥哥倫離坐。握楷達辯之手。至室隅密談。尼卡忒此時百慮交集。自忖據麥哥倫之言。送信者確有其人。第隱披忒之名。乃我無心想像而出。並無其人。何以適與之合。既有其人。則何又不見其來乎。且微爾基詳審縝密。何以忽有如此錯誤之電。

設不錯誤。麥哥倫何爲先期而來。豈馬炳擲出獵之期。亦忽爾改易乎。誠如此。則微爾基探得之後。亦必有第二次之報告。但身旣至此。則與隆道村之交通已隔絕。微爾基卽有續電。亦末由而達。是必浮沉於皮虎佛之酒肆中矣。俯首沉思。未之敢決。至麥哥倫與楷達辯耳語之宗旨。則又與尼卡忒絕異。彼所急欲追究者。則爲猜疑導引之人。楷達辯前時傲然於色。以爲此間別有一天。舍吾儕同黨外。縱有人竟委窮源。亦萬不能達此幽祕之域。今竟出人意表。舉素所深恃者。一旦盡付諸流水。是必同黨之人。出言不慎。致洩此祕密。一時敗興之餘。遂歸咎其同黨之人。而同黨之人。亦復互相猜疑。惶惑不止。斯時尼卡忒亦正在輾轉間。瞥舉首。見麥哥倫

走近身旁。相謂曰。隱披忒君乎。我今有一電信。欲交電局。寄往紐約。汝能承我之命。卽乘馬至隆道一行乎。尼卡忒不覺大喜。唯唯應命。自念今夜雖受微驚。而凡事如願而至。何以若是之巧。正欲求脫身之計。而又忽得此機會。非惟隆道之行。可藉此自脫於難。且麥哥倫與我之信。其中必有要言。我取而閱之。不難悉知其底蘊。謂非一舉而兩得乎。少頃。見一人牽馬至。尼卡忒卽乘之而出。中心愉快。自不待言。豈知尼卡忒出門未及數武。其後卽有一人潛尾而至。其人爲誰。則卽麥楷。二人互商而遣之。薩板喬也。尼卡忒苟會心不遠。於以憶及麥哥倫與楷達辯之小語移時。當必轉喜爲懼也。

第六章 中途疑遇

尼卡忒乃紐約著名之大偵探。腦力甚足。其思想迴不猶人。前數小時所遭之事。祇以爲時太促。未及轉思。且變化離奇。神妙至不可測。一時未能悟及。此際馳驅原野。心怡神曠。憶及前事。不覺疑慮頓起。初以爲容或有之者。今始覺其絕無影響矣。試思隱披忒之名。乃己之所偽造。而傳信之事。又己之所託詞。以莫須有之事。而竟實有其人。實有其事。有若是之毫釐不爽者乎。麥哥倫之所以爲此說者。必已窺破其情。欲將計就計耳。第己係改裝。相識如皮虎佛者。前嘗試之。亦竟茫乎莫辨。而斯時又在黑暗之處。俄頃之間。烏能窺破。意者其窺破不始於此夜。或麥哥倫預探知己飾爲印地安人。入此巢穴。而楷達辯夢未覺。恐其墮入計中。因先期而來。

以破我計。然果若此。方且禁錮之不暇。何以反與己以逃逸之機會。思之正未得其故。忽覺身後足音蹙然。彷彿有潛躡其後者。雖其聲甚微。不甚可辨。然以尼卡忒之耳聰目明。無微不察。早料其後必有尾己之人。但亦絕不返顧。一若仍未覺察者。隨舉鞭一策。直馳而前。始恍然曰。彼所以遣赴隆道者。大有故在。彼蓋未明導引麥哥倫之爲誰。以爲此人必爲我之同黨。而我至隆道。亦必與此人相見。彼尾我而往。實欲踪跡我等之所在。設計併殺之。以爲滅口之計。不然。彼恃巢穴之固。壞法亂紀。一旦爲我所知。彼殺之不暇。何肯輕易縱之。以自貽伊戚乎。正思念間。忽抵一山徑危險之處。怪石矗立。溪壑環繞。遂屈曲隨山而行。方繞過山角。瞥見有一絕大

之石。鶻突途中。尼卡忒乘追者未及望見。一躍而下。舉鞭鞭其馬。馬卽盡力奔馳。得得而去。而已則手按槍機。厠身石隙。自念其馬狂奔有頃。方能自歇。而此際蹄聲震耳。已去數十碼以外。追者必循聲而往。出己之前。而已反得出追者之背。以潛窺於其後。計畫既定。伏身以待追者之至。斯時月明如晝。道路分明。遲之又久。未見追者踪跡。心疑甚。回首返顧。忽覩數十武之遙。有一物蠕蠕而動。不辨爲何。迨其行稍近。始知爲一人影。然莫辨此人之爲誰也。旣而愈行愈近。略能見其面目。則一狀貌魁梧之印地安人。其態僵僕。其狀迫促。尤其奇者。衣履一切。悉與己相同。絕無差異。其身亦裹一氈毯。尼卡忒覩此。不覺大疑。自語曰。奇矣。豈適間麥哥倫所言。非盡

子虛。此卽遞信之真隱披忒乎。洵若是。則前之所設想。不無過慮。徒自勞耳。然其間尙有一可疑之問題。則麥哥倫旣信我不疑。何以復遣人尾我之後。是必更有他故。因思追者尙未前來。必與此印地安人相遇。若印地安人果係隱披忒。則追者或與之同返矣。我何不再往一探。以窺其究竟。因輕步出石隙。向月光所不及之處。循原路以行。未及數十步。遙見前有二人。影隨其形。足不停趾。一爲印地安人。一卽薩板喬也。引睇久之。因復折回。望隆道酒肆而來。自語曰。天下事。果有若是之奇且巧乎。初以爲必無是事者。而今竟不爽毫釐。然於我總未能全信。此時亦不必作無端之想像。試卽往皮虎佛處。一詢微爾基。此後曾否有電。然後再行定計。且思且

走。約有半里許。瞥見頃所釋之馬。躑躅草場。俯首覓食。尼卡忒復牽而乘之。疾馳而前。道上雖無所遇。而亦屢屢回顧。若恐復有前此之尾隨於後者。無何。已抵酒肆。尼卡忒急卽下馬。繫馬戶外。疾趨而入。此時飲酒者已盡散。肆中絕無一人。頗覺清靜。尼卡忒逕至櫃旁。則皮虎佛常坐之處。今忽易一德國人在焉。尼卡忒倉皇問曰。皮虎佛安在。德人答曰。彼因有事他出。然不知其何所往也。惟臨行時。囑我代任其事。尼卡忒又問曰。僕名隱披忒。皮虎佛曾有物件託君轉交乎。德人曰。君卽隱披忒乎。彼曾留有一信。囑交君閱。言畢。取而遞之。尼卡忒視其封面。則皮虎佛所致也。啟閱之。有微爾基電信附於其內。上書歪俄明隆道酒肆皮虎佛君收。尼卡忒急

欲知麥哥倫所以不應期之故。心甚迫切。急拆閱。則皆暗碼也。其文甚簡。譯如下。(馬炳擲及麥哥倫今晨離紐約) 尼卡忒閱畢。自語曰。二人所以改期之故。何以並未言明。麥哥倫既來。想馬炳擲當亦在此間矣。遂以此事詢諸德人。德人答曰。未知。尼卡忒聞言。心中益滋疑惑。頓念前時所接微爾基之電。得毋僞乎。果爾。則彼輩所以造此僞電者。意蓋欲緩我之防。然後出我不意。猝然至此。使我不及措手也。由是觀之。則我之干預其間。麥哥倫必已預知之。故有此電。但彼既詳得其情。則我適間已入彼手掌之中。彼何以不即殺我。而反縱我以出乎。彼既令薩板喬躡我之後。何以甫及半途。而又折而他往乎。此其理誠有百思而不得其解者。斯時他且勿

論。特馬炳擲既至此間。不識究居何處。已未入若輩之手。思至此。忽憶皮虎佛尚有一信與我。或者此信即係釋此疑難之問題。亦未可知。因復展閱其原文如下。(尼卡忒君鑒。所附之電。於足下離此酒肆約三十分鐘後交來。恐其中容有要事。或君即來取閱。交特斐刺君轉交。特斐刺者。即現代我任事之人。其人具有熱誠。君如有事。儘可以肝膽託之。皮虎佛泐。)尼卡忒閱既畢。自語曰。彼如知馬炳擲已抵隆道。必能盡情告我。何以信中絕不提及。豈膽如鼯鼠。知而未敢盡言乎。彼特斐刺既云誠實。未必不足爲我之助。此時我且更衣。再往德律風公司。用電話以問微爾基。當可得實。隨向特斐刺索取臥室鑰匙。特斐刺與之。尼卡忒啓門入室。盡復舊

裝。惟面傅以猩紅之鬚。逕詣電話公司。既至。將已意達於幹事員。幹事員導之入電話室。遂用電話往詢。未幾。而微爾基之覆言。已傳入已耳。彼來此往。要言不煩。所談之時。不過數分鐘而已。始知微爾基果祇一電。卽尼卡忒頃間在隆道酒肆中拆閱者。馬炳挪已於是晨離紐約。向歪俄明而來。尼卡忒既詢得其情。卽與幹事員作別。步出公司。蓋當時在微爾基之意。原欲以匪徒計陷之事。告之馬炳挪。使歪俄明之行。因之稍緩。而尼卡忒則以爲不必明言。天下之至難得者。莫甚於時機。今者適逢其會。正可盡其能力。使多數之匪類。盡入網中。而孰知尼卡忒雖有是心。未能盡如其願。自歪俄明以後。所遭者均出諸意外。但尼卡忒則能不避險難。竭其

力以赴之。自思現在最要之問題。莫先於查察馬炳挪之所在。

第七章 故示端倪

尼卡忒既出電話公司。行至中途。忽憶麥哥倫所託之信。猶在懷中。此信非尋常可比。倘彼果以己爲真隱披忒。則此信中必有要語。閱之或可得馬炳挪所在也。遂走至電燈之下。取信閱之。則封面上書紐約著名偵探尼卡忒君收十一字。尼卡忒覆閱數四。不勝駭異。既啓封。則信中之言。均係暗號。諦視良久。終不得其解。徒滋煩擾而已。第思暗碼之信。必有密切之關繫。惟箇中人始能知之。麥哥倫恨我入骨。平日祇恨無機可乘。不能殺我。何以今忽有如此之信。輾轉道旁。思

之不得其故。因念前在紐約探得匪黨欲陷馬炳擲之先。曾查得麥哥倫行賄一案。尼卡忒恐明告於人。衆心或因之惶惑。所以密之不言。卽以微爾基之交情甚篤。亦未嘗稍露端倪。其意欲俟此案結果以後。始一并舉發其罪。而控之法庭。蓋以麥哥倫之變詐百出。欲與之相抗。必慎之又慎。乃可有濟。而楷達辯之黨於麥哥倫亦卽於行賄之案探得之。行賄一案。楷達辯亦身廁其間。彼時猶不過在波斯盾爲麥哥倫之夥友而已。迨其遁至歪俄明後。尼卡忒遂莫能測其踪跡。然心中猶思設法捕之。以爲此案的實之人證。遂立意至歪俄明一行。此尼卡忒之來。所以亦不專爲馬炳擲一事也。尼卡忒既有赴歪俄明之意。尙未啟行。忽又於無意中偵得一

事。一夕。尼卡忒入一食店。具餐未畢。旋有二人入。逕至窗外坐下。距尼卡忒所坐之處。不甚相遠。尼卡忒舉目視之。其人非他。一爲麥哥倫。更有一人。則麥哥倫之傭也。尼卡忒既識其面。恐爲彼所窺。急隱身室隅。聽其相語。而二人所語者。正爲計陷馬炳擲之事。惟其聲甚低。雖相距不遠。亦不甚了了。略聞欲俟馬炳擲赴歪俄明後。卽實行此計。尼卡忒既聞此言。於是歪俄明之行。因之益決。遂摒擋一切。急急於次日來此。斯時尼卡忒身倚電燈桿上。歷思以前所遇。覺有種種可疑之處。未能釋然於心。忽又轉念計陷馬炳擲之事。得毋假設此計。誘我獨至歪俄明地方。彼將乘我不備。而爲殺我計乎。麥哥倫在食店中小話。保無明知我在內。故意與其傭

縱談此事。使我聞之。視爲祕事。遂入其牢籠而不自知乎。麥哥倫以爲既設此餌。我必恃其能力。斗然來此。彼乃得與楷達猗互相設計。乘我孤立無助之際。因而殺之。此種詭謀。亦在人意計之中。是以愈思愈真。愈真愈恐。然前時何以並未計及。則亦有二原因在焉。其一好勝太甚。不料麥哥倫所設之計。狡譎至此。其二則以欲救馬炳擲之心。較爲迫切。初不意其虛者實之。言在彼而意在此也。麥哥倫前此行賄於民。欲民感己之惠。被舉爲官。而我探得其行賄之原委。勢將控之法庭。以正其罪。彼亦既微聞之。故彼之謀我。固有刻不待緩者。思至此。又自語曰。麥哥倫所以釋我之故。果有深意存焉。但既欲迹我。何以忽又中道而止。是不可解。又思索良久。

忽鼓掌曰。悟矣。我與此印第安人。衣冠曾無稍異。薩板喬必爲所誤。以爲我有事而回。遂復反身隨之。但此印第安人。究屬誰何。實所不解。而此際我之設施。何所措手。亦覺心如懸旌。不能定見。無已。且回隆道酒肆。再作他計。遂循途緩步而行。且行且思。久而未已。遙想皮虎佛此時必已歸來。且楷達禡之巢穴。其中奧曲。我已盡知之。是楷達禡不啻已入我掌握之中。旦夕必爲我禽。方躑躅間。忽見一小童旋轉路旁。持晚間所出之報章。以求售。尼卡忒卽購一紙。執而觀之。見第一版卽載云。今晨馬炳擲乘頭等汽車。至歪俄明之隆道村。不期纔至畝科克地方。車忽躍出軌道。雖未受傷。惟遭此虛驚。不覺游興頓減。卽乘原車返紐約。尼卡忒閱畢。自語曰。信

如此說。我豈非虛此一行。旣而幡然曰。我之目的。無非欲藉端以禽彼二人。馬炳擲不來此。然猶得以行賄一端。治二人以應得之罪。若麥楷二人。無論其意本不在馬炳擲。今亦不能乘端以陷害我身。可謂妄費無益之心思矣。言次。瞥見黑暗之處。有一人徬徨途側。去而復來。諦視之。則衣服冠履。皆與己適問所裝之印第安人無異。驚駭曰。此非頃者途中所遇之人乎。迎面而來。必有事故。我當乘間以詢其姓名。未幾。漸行漸近。尼卡忒正欲前問。忽聞印第安人曰。我初來此處。路不甚熟。試問是間有尼卡忒其人。君識之否。此時尼卡忒戴一紅鬚。服常人所服之衣。故未爲印第安人所辨認。尼卡忒答曰。識之。印第安人又曰。君能導我至彼。使與尼卡忒一

謀面乎。尼卡忒曰。汝何事欲見之。印第安人曰。晤後方能面談。不敢爲外人道也。尼卡忒曰。旣如此。盍隨我來。當爲爾覓之。二人遂不復言。向隆道酒肆而行。尼卡忒自思抵酒肆後。必預籌所以應對之法。俄而已抵隆道肆中。則皮虎佛仍未歸。是時酒徒絕跡。惟特斐刺一人而已。見二人入。仍端然而坐。尼卡忒卽囑印第安人小坐於酒肆之側室。謂之曰。爾何名。吾當爲爾轉致尼卡忒。印第安人曰。我名隱披忒。尼卡忒聞言。亦不置答。逕入臥室。去其鬚。易其服。小語曰。世界上名隱披忒者。抑何若是之多乎。此人爲誰。至此何事。則殊不能逆料也。而印第安人承尼卡忒之囑。方默坐外室。靜以俟之。

第八章 大肆劇爭

少頃。尼卡忒著前時賣牛者所著之衣。挺身而出。逕與印第安人相對而坐。問曰。我卽尼卡忒。今茲過訪。有何要事。此時印第安人之面。適爲乍明乍暗之燈影所罩住。聞尼卡忒之問。卽答曰。來此非有他意。行將助汝殺楷達禡耳。素知楷達禡乃君之仇。而我亦不勝忿忿。蓋我曾爲彼傳遞一函。祇以失之稍緩。爲所辱毆。實莫大之羞也。言時。以手撫摩其脣。又屢以大指及將指作相擊狀。尼卡忒自聞隱披忒之名。心甚夷猶。知天下事斷無若是之巧者。迨見其無心流露此態。因忽憶薩板喬平時談論之際。往往如此。注視旣久。始恍然於薩板喬卽以我所嘗試於彼者。轉而嘗試於我。在尼卡忒之銳眼。本難以僞亂眞。特以燈光之下。忽昧忽明。且薩板喬之

皮相。與印第安人絕似。以故未能遽辨。第雖足僞飾一時。久之亦爲所窺破。當時尼卡忒雖已了然。然其容曾不稍改。謬問曰。我與楷達辯有隙。汝何由而知之。薩板喬僞應曰。我乃麥哥倫之傭。此中祕密。我盡知之。尼卡忒又曰。我欲殺此二人。汝將何以爲助。薩板喬曰。我必能爲汝奧援。謂予不信。試向窗外一望。卽知我之目的矣。尼卡忒驟聞是言。心頗驚訝。因思窗外有何可異之事。遂自案側向外一望。不期尼卡忒方一回首。薩板喬已突出其刃。疾趨而前。直向腰間刺去。尼卡忒身忽旋轉。一躍數尺。其刃直刺入空際。蓋尼卡忒於危險之事。閱歷甚深。當時雖掉頭外向。而心中早經慮及。故薩板喬未及近身。而彼已躍至其後。乘勢緊握其執刀之手。盡

力一絞。臂骨砉然作聲。刀卽墜地。尼卡忒更以一手力扼其吭。向後猛推。薩板喬身不自主。踉蹌及几。几與人俱倒於地。而薩板喬已狀若昏暈矣。特斐刺兀坐櫃旁。聞二人始而聚談。繼忽喧攘。殊莫明其故。手持木棍。疾趨而入。見尼卡忒聲色俱厲。卽問曰。印第安人何在。我爲擊之。尼卡忒方欲相告。忽聞門外槍聲猝起。側首窗上玻璃忽砰然有聲。有一彈從尼卡忒耳邊飛過。正中特斐刺之肩。尼卡忒知事機危迫。急與特斐刺俱伏身上。疾出手槍。將所懸之燈。一擊破之。室中卽黑暗於漆。而通酒室之門。則仍敞如前。此時惟酒室中略有一線之光而已。二人旣伏身室隅。忽又寂然無聲。約越十分鐘之久。旋聞窗外足音蹙然。自後而前。門闐然作聲。則

酒室之外戶已洞然大闢矣。尼卡忒遂一躍而起。右手握槍。將槍口對於所通酒室之闌闌之間。鵠立以俟。但聞一人聲。若洪鐘。大言曰。製肝氣丸之醫生。疾速出來。我再爲之跳舞。以供一覺。我已於窗中見汝隱身於內。汝雖恇怯。然不出亦無益也。尼卡忒知此卽楷達辯之聲。始恍然於薩板喬所以囑已試望窗外之故。蓋彼既可乘己不備。自後刃之。且楷達辯輩已環伺窗外。因而衆槍畢集。內外夾攻。雖智勇絕倫。亦必爲其所算。思至此。忽又聞閭中有擊撲之聲。少頃。又若有被人喉間扼住。喘氣不能成聲者。尼卡忒亦不暇顧及。蓋此時薩板喬忽已由暈而甦。兩目迷糊。誤以特斐刺爲尼卡忒。潛近其旁。以手力扼其咽喉。特斐刺身旣負傷。無力與之相

角。思欲呼救。而又噤不能聲。方危急間。尼卡忒聞其氣喘聲甚急。頗類特斐刺。遂走至二人之旁。薩板喬見有人前來相助。卽舍去特斐刺。猛力向尼卡忒撲去。尼卡忒俟其切近。急以槍擊其首。薩板喬又倒於地。正在此時。陡聞槍聲大作。彈如雨集。向窗櫺間飛射而入。尼卡忒恐勢不能敵。左右手各握一槍。雙槍上舉。倚門而立。是時忽有二人。肩荷快槍。自牆外一躍而進。旣入。見尼卡忒雙槍並指。恐爲所斃。又爭先閃避。急不能擇。而尼卡忒瞥見其來。彈已疾發而出。二人避之不及。一中其肩。血流如注。一傷其足。蹶於室隅。尼卡忒語曰。以我之槍法。據守此間。斷不使匪黨越雷池一步。特恐彼或由窗入室。則前後受敵。如之奈何。言未已。果有二人啓百葉

之窗。跳身進內。尼卡忒見之。疊放二槍。二人應手而倒。夫尼卡忒槍法絕倫。擊無不中。未始不足以資護衛。第彼衆我寡。苟不善籌避匿之策。必爲所困。蓋楷達猗之兇橫莫匹。村人無不畏之。人皆謂楷達猗此來。無非因跳舞之故。爲洩恨計耳。且舍皮虎佛以外。舉莫知尼卡忒之爲有名偵探。類皆以牧牛者視之。有此二因。誰敢爲之援助。尼卡忒身在重圍。相持不下。因思皮虎佛計可歸來。其人忠於爲友。倘一見楷達猗之困我。必怒不可遏。奮身相救。或致反爲所傷。念至此。因思急離此處。非惟己不至瀕於危。卽皮虎佛亦不致因篤於友誼。遂奮然不顧其身也。然自大門而出。總不免與之決戰。槍彈如雨。何以禦之。正籌思間。忽聞槍彈俱息。室外寂然無

聲。心又疑甚。慮其或以前者未足取勝。別謀他法以擊之。抑以欲取先與。使已疏於自防。因而攻之。尼卡忒計畫良久。忽得一對付之策。在當日危急時視之。則除此亦別無他計。蓋尼卡忒思將薩板喬所著之衣。加諸己身。飾與薩板喬無異。冒險逕出。與楷達猗略事敷衍。乘間逸去。計畫已定。因急將薩板喬之衣脫去。易以己衣。而已即著薩板喬所著之衣。以彼易此。部署方畢。時室中雖闇。幸藉前面酒室之燈光。微微可辨。正將氈毯披上。忽見有一小紙。黏於氈毯之旁。因披著時。此處適在背後。故未爲薩板喬所見。尼卡忒始亦不辨爲何。迨取而一閱。則皮虎佛書也。其文如下。尼卡忒君鑒。前君與楷達猗同赴巢穴時。僕曾尾於其後。蓋以其居幽險。人莫

之知。僕故遠遠相隨。謹識其處。脫君遇危險之時。僕不至欲來無自也。君離隆道後。紐約又到一函。適有一黑髮者蒞止。未得導引之人。僕因僞言相應。與之偕行。意蓋欲乘間以致此信於君耳。其後未得如願。乃更僞飾印第安人。逕來相探。不期身纔入門。旋被窺破。現在徧受慘刑。幾瀕於死。望君勿以僕爲念。前途珍重。皮虎佛冒險泐此。尼卡忒反覆視之。自語曰。此信之所以黏於此處者。必皮虎佛欲達無從。審知薩板喬專爲探我而來。因設法黏附於此。浮沉在所不計。其書非假。其心甚苦。吾讀此書。始恍然於皮虎佛卽導引麥哥倫之人。亦卽在途所遇之印第安人。苟當時途中相值。吾能與之畧談數語者。彼不至受此日之苦矣。彼甯捨己助友。而其

書尙云勿以爲念。蓋深恐我因此深入。或蹈不測。如此之人。實非多覲。言至此。頓露愁容。搔首無計。少頃。又端嚴曰。若皮虎佛因之而死。吾必有以報之。須知爲良友而捨身。急於爲己。斷不使皮虎佛受此非常之慘苦。而束手不之救也。語未既。忽聞槍聲。轟然一震。尼卡忒猝不及防。遽中彈而倒於地。

第九章 奇刑可慘

僞飾楷達。猗之傭。而導麥哥倫至其巢穴者。果係皮虎佛所爲。其所以爲此者。悉如書中所言。欲覷便以電信交尼卡忒。且乘機以爲一臂之助。蓋皮虎佛自與尼卡忒相識。卽不啻膠漆之投。故其設計雖若甚愚。而實亦由其心迫切所致也。迨既至其地。則重門深閉。山巖壁立。自思偷竄然逕入。設有

敗露。無路可逸。不如姑返隆道。更作他計。忽又念尼卡忒既僞爲印第安人。計惟飾與相似。或者出入之際。不致爲衆人所注目。倘遇盤詰。則亦僞稱爲麥哥倫之傭。彼蓋不知前所導引者。卽爲麥哥倫。而猶將藉肆其僞言也。於是祕不告人。卽特斐刺之前。亦祇云有事他出而已。旋即善自修飾。由後門而出。既就道。忽與薩板喬相遇。薩板喬誤以爲尼卡忒也。見其匆匆復返。既未便啓問。亦卽隨之而回。既至。麥哥倫心竊竊喜。謂尼卡忒已墮其計中。然又疑其往返之速。因問以送交電信之事。皮虎佛聞之。瞠目不能答。惟含糊應之。麥楷二人始悟其非尼卡忒也。審察之。乃得皮虎佛之真相。心亦喜甚。蓋楷達辯本與皮虎佛有隙。今者不召自來。殊非意料

所及。且麥哥倫之鄉導。懸揣久之。並無所得。今則於無意之際。頓悟其人。惟此居之幽深險固。所能知其奧者。皮虎佛外。更有一尼卡忒。故雖喜皮虎佛之自入網羅。又深慮尼卡忒之得脫。必貽後患。因痛責薩板喬。不應如此疎忽。一任尼卡忒逸去。薩板喬無詞以對。然事已如此。責之何益。麥哥倫俯首良久。思得一計。謂皮虎佛既改裝印第安人而來。尼卡忒必預知其事。今苟令薩板喬亦飾與皮虎佛相同。逕往隆道酒肆。訪得尼卡忒踪跡。然後誘而禽之。是爲上策。設計已定。遂囑薩板喬實行。楷達禰又遣數人隨於其後。匆匆離巢穴而出。麥楷等又囑曰。倘能誘尼卡忒重來此處。最善。萬一堅不肯來。則逕殺之。毋令逸去。薩板喬應命。遂別二人。疾赴隆

道薩板喬既去。楷達禡猶恐有失。隨亦親至隆道。伏於酒肆之側。以爲薩板喬之助。薩板喬方至電話公司前。適與尼卡忒相遇。因飾言以告。與之偕行。迨至隆道酒肆。楷達禡等但見薩板喬偕一人同來。初猶以爲非尼卡忒。以其口有紅鬚。大異前此之印第安人狀。故疑而未信。嗣後尼卡忒去其紅鬚。服其故服。楷達禡等始由窗中窺得其本來面目也。斯時尼卡忒正在危急之時。而皮虎佛亦正被奇刑慘酷。在求死不得之時。蓋皮虎佛自被窺破之後。自知必無生理。然與其隱忍而不免於死。何若肆其辱罵。以求速死之爲快。於是大肆咆哮。痛詈不絕。以故反激麥哥倫之恨。初擬以槍斃之。今反不欲其速死。欲令徧受人類中最慘之刑。此刑非惟文明

國所未有。卽稍有人心者。亦不忍寓目。蓋創此刑者。爲楷達
辯手下之人。其人本多印第安種。故其野蠻之性未脫。而兇
險若此。其刑維何。則毒蛇致死法是。當時皮虎佛爲衆人接
之於地。四肢之側。均置木椿。以生皮帶堅縛其四肢。而繫之
椿上。是時天方破曉。石上微透明光。而燈火徧置四圍。熒熒
如故。洞中諸人。亦多有未見此刑者。羣集而觀。印第安種人
卽取一大鑽背響尾蛇。釘住於地。蛇被釘住之後。蜿蜒不已。
又以一雙叉之棒。叉住蛇首。用刀在蛇項下刺一小孔。而以
生皮帶穿之。其帶與縛皮虎佛者相似。惟稍細耳。印第安種
人又復自皮虎佛首邊起。細細一量。約離尺許。更置一木椿。
將所縛蛇項之生皮帶繫之。繫時非常留意。若惟恐毒蛇之

牙之攫其身者。是時其法雖備。未見實行。旁觀者悉圍繞以覘其異。麥哥倫獨往獨來。揚揚自得。蓋彼嘗聞印第安人有毒蛇致死之法。爲世界上第一慘刑。恨未能適逢其會。一擴眼界。今始遂其平生之願。而仇恨亦於以洩矣。蛇旣受割縛之痛。狀若癡狂。縱躍不已。其首距皮虎佛不過三寸之遙。屢張其牙。向皮虎佛頭額嚙去。惟爲皮帶所牽掣。未能噬及。尾則盤旋於皮虎佛身旁。鳴響不已。皮虎佛至此。覩之亦不覺生怖。然印第安種人之凶狠。此時猶未達於極點也。已而取水一桶。身坐其側。左手持長棒。擾蛇使怒。右手則執竹管一枝。貫水使滿。滴在繫蛇於木椿之皮帶上。滴盡復貫。貫而復滴。觀者初不得其故。互以爲異。旣而始知其用意之所在。卽

生皮得水則漲之故也。蓋蛇首距皮虎佛之身約三寸。而其距木椿也。亦有三寸。水滴其上。則帶愈長。卽與皮虎佛之身愈近。蛇得水之助力。而又爲長棒所攪擾。益勃怒不可制。跳躍直前。惟思得人而噬。第帶初得水。其漲力猶未足。故此縮彼盈。猶有二寸許之隔。然張其巨口。肆其毒牙。終必噬及皮虎佛之身而後已。噫。此卽所謂毒蛇致死法。被害者所受之恐怖之痛苦。殆非筆墨所能罄也。麥哥倫俯首而視。見皮虎佛仰臥地上。手足不能稍展。乃笑謂曰。皮虎佛。汝其勿逃。汝雖退避。亦屬無濟。此蛇終須嚙汝也。又轉身謂印第安種人曰。帶猶未長。汝其再滴以水。言訖。口吸雪茄。笑容可掬。印第安種人。果又以竹貫水。屢屢滴之。其帶愈伸愈長。蛇首漸次

及皮虎佛之面。相去者僅寸許耳。然相隔雖祇寸許。奈奮身
屢躍。終爲皮帶所掣。未得近身。蛇亦似覺勞而無功。不若前
之跳舞不已矣。此時皮虎佛四肢既不能稍動。而蛇又異常
凶惡。雖未爲嚙。其所受之苦。有非局外所能代述者。然自知
懼亦無益。故面不露畏縮之容。麥哥倫見蛇猶未及皮虎佛
之身。心中不覺躁急。謂印第安種人曰。嗎蕘。汝何不再加以
水。嗎蕘聞言。卽又滴之。皮帶愈覺其長。蛇又向前一躍。相距
已不過半寸許。勢已將及。麥哥倫曰。如此奇景。實所罕覩。我
甚願楷達辯在此共賞之。恨未能耳。又謂皮虎佛曰。我之友
乎。蛇之牙入汝之肉。面部將有奇異之疤。所以令汝如此者。
乃報汝之仇。視吾儕。使汝一試吾儕手段也。言至此。又向嗎

賈曰。何以乍滴乍輟。可迅加之。嗎賈微笑應命。是時心稍慈仁者。見此悲慘之狀。皆以目不忍觀。漸漸退去。而麥哥倫則仍談笑自若。毫不在意。但見旭日初升。光線照於石壁。窟中上下通明。皮虎佛舉目四顧。微微歎息。以爲此正我謝絕世界時矣。因再滴以水。帶必愈長。瞬息必膏毒蛇之吻。又見嗎賈且將舉盛水之具。盡以滴之帶上。噫。皮虎佛其危矣哉。

第十章 以僞亂真

上章所述尼卡忒於無意之中。陡中一彈。倒臥於地。其彈正中左臂。血流不止。在讀者必疑尼卡忒拒於闔闌之間。不暇他顧。此槍由後窗而入。致爲所中。發此槍者。非楷達齋。卽楷達齋同來之徒黨。而其實不然。蓋尼卡忒於外患之來。非常

戒備。卽其閱皮虎佛信時。目光亦時時兼顧。慮爲所算。不料其精神所不屬之處。前時暈絕於地。寂寂無聲之薩板喬忽爾一躍而起。發此最後之一槍。竟爲所中。蓋薩板喬暈絕已久。當尼卡忒去其衣時。彼已清醒。特以身軀怯弱。力不足以抗之。故仍僞爲昏迷狀。任其彼此相易。而心中默默籌畫。思正可乘其不備。突起殺之。但前所攜帶之手槍。盡已失去。斯時手無寸鐵。不能徒手而搏。因稍稍開目竊視。見特斐刺睡處不遠。二槍儼在其旁。遂乘尼卡忒注目觀信之際。蛇行而前。竊槍在手。將火機撥動。卽向尼卡忒激射。在尼卡忒雖加意隄防。初未料薩板喬靜極而動。有此一槍。遂倒於地。然尼卡忒左臂雖傷。右臂則仍無恙。一剎那間。早已握槍在手。回

指薩板喬胸次。遠遠取準。然明知此槍一發。薩板喬立死。故猶對之惻然。其彈不忍遽發。正猶豫間。忽見暗中火星迸裂。一彈自耳旁飛過。尼卡忒因思薩板喬之視已。不死不快。則爲衛身計。勢不得不還擊之。於是槍機一按。其彈適越薩板喬之胸部。又倒於地。尼卡忒固不爲己甚。故此次之擊。猶不足以致死。然欲其復甦。亦正有待耳。尼卡忒將槍入囊。躍身而起。效薩板喬之語聲。面外而呼曰。諸君乎。可速入內。僕已將尼卡忒擊死矣。語竟。卽趨至後室之外。楷達禰及其同黨聞之。相率厯階而升。爭先恐後。楷達禰見僞薩板喬出。略一點首。語之曰。我意汝已爲彼所殺。乃竟反其道而行之。誠爲汝幸。言次。卽指左臂之傷痕曰。此爲彼所傷乎。流血何若是。

之多也。尼卡忒以布裹其傷處。謬答曰。然。方彼探首窗外。我擬自後刃之。不料爲彼所覺。擊我仆地。我卽乘機僞爲昏暈。以嘗試之。彼果墮我術中。戒備稍弛。我見其面方向外。遂自後奪槍擊之。言至此。手指內室。謂楷達辯曰。彼仰臥於地上者。非尼卡忒之屍乎。楷達辯欣喜非常。取櫃上所置之皮酒。舉瓶豪飲。且飲且答曰。自初時觀之。吾屬將爲彼虜。深悔當斷不斷。不殺之於隨我之時。庸詎知亦有今日乎。言畢。移步入室。是時天方破曉。晨光透入室中。而酒室中燈火尙熒熒也。薩板喬衣尼卡忒之衣。飾尼卡忒之貌。面壁而臥。楷達辯注視移時。復取七門之手槍。向薩板喬射去。其機一撥。彈火應手而出。幾徧其體。楷達辯旋收其槍。握僞薩板喬之手。微

笑而言曰。尼卡忒之死。實吾儕無窮之幸福也。尼卡忒名冠五洲。詭計百出。人莫敢與之抗。然欲與我爭。抑亦偵矣。薩板喬乎。今者我與汝置之於死。此後當高枕無憂矣。言次。喜形於色。傲然自得。噫。薩板喬自謀害之情露。與尼卡忒幾成不解之讎。他人處此。殺之惟恐不速。乃尼卡忒不忍遽置諸死地。遂使同類相殘。薩板喬不死於其仇。而轉死於其同黨。楷達辯之手。造化之顛倒弄人。抑亦奇矣。彼時尼卡忒聞楷達辯之言。並不置答。自思楷達辯既爲我所給。今當更從何處着手。以楷達辯窮凶極狡。罪不可道。在理我當挺身而出。明告以我尼卡忒尙在。而與之決一死鬪。顧念皮虎佛陷身彼窟。方引領以望我之救。我若一與決裂。則決鬪之下。勝負未

可逆觀。倘爲所殺。則更無一人。可爲皮虎佛救矣。輾轉計畫。頗覺爲難。正沉思間。忽聞楷達辯又朗然言曰。諸君乎。殺斃尼卡忒之問題。甚非易易。今乃得償我願。誠爲快事。我無懼矣。汝等曷同入酒室。各倒酒暢飲。以慶斯舉乎。我等之仇。尼卡忒而外。更惟皮虎佛一人。今皮虎佛亦已被繫窟中。無能爲患。我等同飲數杯。猶須仗諸君之力。將此酒室毀爲荒場。然後言歸。置皮虎佛於死地。則永無後患矣。衆人聞言。正揚揚自得。各置槍械。舉酒痛飲。陡聞發一暴厲之聲。自內而外。曰。汝何人。何得肆意妄爲。汝曹速將兩手上舉。聽我處置。否者。請試此槍。此聲突如其來。莫辨其爲誰何。惟尼卡忒聞之。心竊竊喜。蓋已辨其爲特斐刺之聲。語旣畢。旋見特斐刺疾

躡而出。手握二槍。直指楷達禡之面。叱曰。若稍動者。槍機一下。汝首且立碎矣。楷達禡措手不及。不能抵禦。其同黨三人。一時未及取其槍械。亦惶然無措。且恐楷達禡之被傷。莫敢先發。相視多時。祇得將手上舉。尼卡忒一時未便自明。因亦如之。特斐刺見衆皆莫敢違其言。始傲然曰。汝輩以我爲真死。敢猖獗若此。膽過量矣。彼尼卡忒乃吾友之友。而汝等竟敢殺之。此讎烏得不報。汝等四人速立於旁。吾先將手刃此服印第安人之服者。以報我友尼卡忒於地下。汝等未承主人之允許。擅入此室。飲酒不已。且欲毀其廬。此罪吾亦有以報之。言訖。又厲聲曰。薩板喬速前。勿與諸人共坐。此時尼卡忒受其逼迫。亦頗危險。蓋薩板喬衣尼卡忒之衣。僵臥於地。

特斐刺初未注視。以爲尼卡忒已爲所殺。忿忿於心。且見尼卡忒裹其氈毯。與薩板喬無異。倉猝之間。更不能辨其眞僞也。楷達猗等覩此情形。驚惶殊甚。不覺其素行畢露。蓋平時楷達猗與薩板喬何等親密。幾若患難安樂。無不可共。不謂猝遇緩急。惟知保一己之性命。不但與薩板喬漠不相關。且恐因之波及。又回顧僞薩板喬。則舉止自若。毫無畏怖之狀。一若恃人爲之輿援者。因亦怒目視之。厲聲謂曰。彼命汝前。汝速離此。汝亦思我等能爲汝死乎。餘三人隨聲附和。如出一轍。言未已。尼卡忒已陡然直立而起。再舉目一視。衆人罔不失色。但見尼卡忒擲帽於地。脫其所裹之氈毯。一手握槍。鵠立室中。忽爾形容俱變。易其頃間之語聲。怡然曰。特斐刺

君乎。室中乃薩板喬之屍。尼卡忒猶未死也。特斐刺聞言。恍然大悟。笑容可掬而答曰。尼君其未死乎。深感上帝。尼卡忒謂曰。楷達禱所率之三人。懷中俱有槍械。汝其一搜。塞其口而縛之。又謂楷達禱曰。汝如不欲遽死。安坐毋動。言畢。又以槍擬其面。特斐刺置槍於囊。前搏三人。三人不能拒。以次就縛。楷達禱爲尼卡忒所逼。遂亦袖手旁觀。默然不語。而心中怒甚。目視尼卡忒曰。汝欲使我死於此乎。尼卡忒儼然曰。前時汝欲殺我。我今以此報之。亦屬分所應得。雖然。殺汝亦不足奇。我今以汝之道。還治汝身。汝每欲與我挑戰。今當試之。但二人之中。必有一死。可請特斐刺爲公證人。我與汝一決可也。於是三人各執手槍。尼卡忒南向而立。楷達禱立於門

旁喜出望外。自念自己瀕死。不料尼卡忒愚昧若此。允我決戰。使已轉有生機。蓋楷達禱之槍法。在西方舉無有駕而上之者。以爲尼卡忒必不能勝已也。此時特斐刺亦自倚櫃旁。瞠目注視。專待二人之決鬪。

第十一章 禍福變更

尼卡忒與楷達禱立俟特斐刺決鬪之令下。卽挑身獨戰。而斯時皮虎佛所遭之境。更屬可危。蓋響尾蛇之齒。其毒無倫。稍及其膚。三小時後卽斃。且受毒之後。其痛苦幾不能以言語形容。故毒蛇致死法。爲獨一無二之慘刑。當時嗎蕘右握雙叉之柄。擾蛇使怒。左舉盛水之器。行將盡以滴之。其所以不遽滴者。蓋欲使蛇之怒達於極點。然後以水加之。則其嚙

也。自必益力。嗎蕢雖印第安種。而實非純爲印第安種。其種
介乎紅白之間。故較眞印第安種人。其凶很爲尤甚。蓋紅白
人之性質。善與惡固有不同。而嗎蕢則於紅白兩種極惡之
性質。兼而有之。此時雙叉之木。擾之益急。蛇之怒亦益暴。而
嗎蕢意氣揚揚。其興勃發而不可遏。左旋右轉。愈以極其掉
弄之奇。水流徧地。滓滑不可插足。嗎蕢亟亟注水復滴。忽促
之際。一足忽絆於木椿。地復滓滑。一時立足不定。遽然而仆。
其身適倒於毒蛇之旁。蛇方暴怒已極。無可肆其毒噬。忽見
嗎蕢倒地。遂縱身而上。遽嚙其面。嗎蕢痛極而號。其聲震耳。
慘不忍聞。兩手不知所措。一若握物可以稍減其痛者。亂掬
多時。因將縛蛇及皮虎佛之木椿。盡行拔去。豈知其防一潰。

蛇愈肆其威。嚙之殆徧其膚。嗎賁倏俯倏仰。輾轉求避。去故處已有數武。而蛇仍隨之。而前。終不能脫其纏繞。麥哥倫等驟覩此事。不覺驚駭非常。手足無措。雖欲救之。幾不知其所從出。一時衆人中有懼被蛇嚙而逃避者。有植立而不發一語。徒滋嗟歎者。有徒手摩蛇使去者。號叫紛呶。莫衷一是。皮虎佛自其縛既釋。仰臥移時。始覺血氣貫通。精神如故。見諸人咸集嗎賁之側。無有注意及己者。因急躍起。將其餘未釋之皮帶。一一釋去。瞥見室隅置有槍械。子彈甚夥。相距匪遙。遂輕步至前。潛竊其一。乘守門之二人。亦正在圍觀之際。遂反身出洞而逸。是時麥哥倫見嗎賁始猶縱躍。繼漸昏迷。知不可救。大聲曰。嗎賁被嚙至此。勢難復生。徒受非常之痛苦。

耳。不如速置諸死。汝等勿逼視之。衆聞其言。始漸散。然猶遙立而觀。麥哥倫卽取槍於手。向嗎賈按機一發。彈火如飛而出。惟麥哥倫槍法甚劣。其彈子擊至草坡間。去嗎賈遠甚。麥哥倫見未能命中。再擊之。仍不中。環而觀者。咸爲之失笑。麥哥倫不覺變羞成怒。將槍擲諸地。以足踐之。叱其旁一人曰。汝乃我之傭。我旣不能取準。汝何以熟視無覩。不助我擊之。其人應聲而前。雙槍齊舉。彈卽隨之。略前之一彈。適中嗎賈之腦部。腦漿迸裂而死。其稍後一彈。正擊蛇體之中央。將身截而爲二。麥哥倫見二槍皆中。稍稍快意。方一轉身。忽驚異曰。噫。彼何往哉。皮虎佛逸矣。汝等各負短槍。速出追之。設不能擒獲者。可擊殺之。切勿令其逸去。蓋先時諸人注意嗎賈。

環立而觀。幾置皮虎佛於度外。以故皮虎佛得乘其不備。竊取手槍。輕步循石路而出。苟非麥哥倫顧及皮虎佛。且去遠矣。當時諸人驟聞麥哥倫之命。心志俱亂。驚惶失措。且執槍者祇有五人。餘皆徒手而立。乃急至前時皮虎佛竊取槍械之處。各取其一。倉皇而出。五人者知事已急。不能相待。舉足爭先。皮虎佛行尙未遠。聞其後足音雜遝。知追者將至。急轉槍取準。槍機一撥。其彈連續而出。非惟擊無不中。且皆中其要害。三人應手而斃。尙有二人。身受重傷。亦瀕於死。皮虎佛旋即隱身隘口。以石自蔽。其後諸人見前行者俱倒地。荷槍向前。則皮虎佛忽又不見。驚疑久之。頗畏懼思退。奈麥哥倫已接踵至。催督甚迫。不得已再鼓勇直前。奮身向隘口而進。

不意未及數武。忽火星迸裂。彈如雨射。一彈正從麥哥倫頭頂飛過。帽墜於地。方俯身欲拾。旋有一彈中其左肩。痛極欲仆。心膽亦幾乎震碎。皮虎佛據此要隘。不啻虎負隅。莫之敢攖。麥哥倫及同黨諸人。惟恐爲槍彈所及。側身遙立。莫敢前進。惟專盼楷達猗等歸來。前後夾擊。或可勝之耳。此時爲皮虎佛計。佇立於此。最爲上策。倘或捨此險要。則彼衆我寡。麥哥倫等得以分隊擊之。已旣無險足恃。勢必復爲所禽。但皮虎佛雖慮及此。因念楷達猗等外出已久。斯時必將歸窟。倘楷達猗等一歸。則前後受敵。何以爲禦。思至此。計惟早離此間。馳回隆道。然又念此身一出。則衆槍畢舉。以一身爲衆射之的。亦必不免。必思得一善計。方能得脫。躊躇良久。忽得一

策乘其不備。突從隘口躍入一石室。撥動槍機。其彈不啻猛雨之驟集。麥哥倫輩正畢列於石壁之前。向皮虎佛所踞處。瞠目而視。初不料其迅躍而入。彈火交下。隨急退避於旁。衆槍畢舉。以還擊之。不謂彈方出口。皮虎佛迅捷無倫。已躍回故處矣。衆人爲煙焰所蔽。未見皮虎佛之出。因仍舉槍以俟之。皮虎佛見衆已離隘口。已可由旁繞越。不爲所覺。欣喜過望。自語曰。我今可以逸矣。遂逕出隘口。向隆道疾馳而去。麥哥倫諸人見皮虎佛凌轢無前。知不能敵。退避不敢遽進。及守候移時。不見動靜。試探之。則皮虎佛已杳。於是復催迫其衆。各納彈於槍。齊趨隘口。則亦闐其無人焉。衆人見皮虎佛已去。其膽復壯。謂其必中情畏怯。因而逃逸。遂復一鼓作氣。

向前直追。皮虎佛自離石室。盡力狂奔。深知此計。不過掩飾一時。久必爲人所覺。途中加意隄防。且行且顧。距石室約八百碼之遙。見麥哥倫已率多人。蜂擁而至。卽轉身駐足。以槍擊之。中彈而倒者三人。諸人氣復爲餒。雖屢屢發彈還擊之。第氣餒之後。心愈惶亂。其彈愈難取準。以故所發之彈。欲左反右。欲右反左。無一彈得中皮虎佛者。皮虎佛見其槍法甚劣。知不足慮。遂又轉身而奔。荷槍於肩。握彈於手。且奔且納。自忖曰。苟途中不與楷達辯諸人遇。或不至爲彼所獲。蓋以我一槍。以敵彼衆人之槍。當綽乎有餘也。於是皮虎佛疾馳於前。麥哥倫諸人緊隨於後。與獵犬之求逸免。幾無以異。若再越數十分鐘者。皮虎佛且及隆道。可以脫身於難矣。孰意

正在此間不容髮之時。忽有一人接踵而至。其人爲誰。則卽麥哥倫之備。槍斃嗎賁者也。其人槍法之精。不下於皮虎佛。而爲儕輩中冠。麥哥倫初使之守窟。未預斯役。迨見衆人不能勝。乃復令人促之來。故後至也。既至。見皮虎佛身法靈敏。猥捷如風。衆彈無一中者。則大怒。然仍隱伏衆人之後。絕不爲皮虎佛所見。或致預防。既而遙遙取準。陡起一發。皮虎佛初不見其槍上舉。猝不及備。而彈已倏忽着體矣。陡覺左股痛如刀割。不能稍忍。遽將倒地。身未倒。又有一彈破空來。中其左臂。遂仆地不能起。皮虎佛經此大創。痛楚至難言狀。而手中尙堅握一槍。臥地還擊之。自念身既中彈。勢難復生。然我必力疾而起。將麥哥倫擊殺。使彼不得獨存於世。我恨乃

洩。嗚呼。就此時觀之。皮虎佛欲復享人間之幸福。蓋亦難矣。

第十二章 重臨幽窟

尼卡忒與楷達辯在隆道酒肆中。抖擻精神。爲挑身獨戰之預備。筋骨暴露。直立不撓。各執五門之手槍。槍口上指。惟俟特斐刺宣戰之令下。立決勝負。然此決戰之問題。以楷達辯視之。方竊竊私喜。蓋彼恃槍法之高。與人決鬪。不下數十百次。無往弗利。曾未有與己敵者。因思己已當束手就縛之時。而尼卡忒忽竟許之決戰。若與己以意外之機會。正可藉此一擊。致尼卡忒死命。以達其欲達之目的。然後救其徒衆。遁跡窟中。永無後顧之患。思至此。意氣揚揚。傲然自得。而彼又豈知尼卡忒之槍法。固亦寡二而少雙者乎。二人方凝神而

立。忽見特斐刺容貌端嚴。申令曰。一。二。三。其三字言猶未畢。楷達猗身卽轉旋。槍機一落。煙焰應手而發。尼卡忒則俟特斐刺之聲止。方欲轉身。瞥見熒熒一彈。迎面飛至。尼卡忒略不驚惶。待其將及面部。橫槍一撥。彈卽砉然墜地。楷達猗見其有舉槍撥彈之絕技。不覺失色。心膽陡寒。第二彈未及發射。其食指及左足間。已爲尼卡忒二槍所中。痛不能耐。身與槍俱倒於地。僵臥不復能動。其所以不致之死者。正足見尼卡忒槍法之精妙。蓋取準於要害之旁。使其手不得拈槍。足不能點地。而又不令遽死。留之以作證也。於是尼卡忒搜其身旁。盡取其槍械。一手握槍。立於其側。楷達猗奔走竟夕。疲憊已極。復受此大創。已無餘勇之可賈。惟俯首待斃而已。又

見尼卡忒兩目眈眈。持槍相對。畏怖之色。形於其面。尼卡忒謂曰。前言汝我二人。必有一死。今定矣。然我不爲已甚。姑留汝命。我今問汝一言。汝必實告。楷達辯自分必死。及聞是言。反若猶有希望。卽問曰。所問若何。尼卡忒曰。我所問者。乃汝等之計。陷馬炳。爲果有是事否耳。我意我之探悉麥哥倫納賄一事。麥哥倫已知之。恐我昌言於衆。遂假馬炳擲圍獵之問題。誘我來此。爲乘間殺我之計。然否。楷達辯聞言。噤不作聲。注視尼卡忒良久。始愁容滿面而答曰。我之生命。已歸汝掌握之中。諒亦不能不答。此事亦未必專屬於汝。特欲一舉而兩得耳。尼卡忒曰。汝曹之計誠譎矣。其如尼卡忒之不易與何。卽謂特斐刺曰。麥哥倫行賄之事。須得楷達寫一

承認之字據。汝可授紙筆於我。令彼書之。楷達猗聞之。怒甚。厲聲曰。汝欲我書此字據。意將何爲。尼卡忒曰。行賄之事。爲法律所不容。憑此字據。將治以應得之罪。言至此。復以槍擬之曰。我之所命。汝敢不從者。立斃此槍下矣。楷達猗有畏色。遲疑半晌。無如之何。祇得遵尼卡忒之言。俯首書之。約歷十分鐘之久。始草草書畢。以授尼卡忒。尼卡忒取而閱之。其大旨書麥哥倫行賄之原委。而已亦與焉。其語甚夥。閱畢。卽藏之懷中。遂與特斐刺二人共繫楷達猗手足。與其同黨之三人。共置一隅。特斐刺向四人微笑而言曰。汝曹不自量力。貿然欲與素有盛名之偵探抗。何啻以卵擊石。自取其禍。亦何足怪乎。尼卡忒曰。特斐刺君乎。我今欲至成法官處一行。所

縛四人。汝可謹守於此。楷達猗尤宜加意隄防。蓋將來控告麥哥倫行賄一案。全恃彼爲證人。關係匪淺。君其慎之。至於皮虎佛被拘石室之中。勢不得不爲援助。至成法官處後。急須往救。此事我獨任其難可也。叮嚀旣畢。方欲舉步。忽聞途中馬蹄聲得得不止。雜然而至。旋有多數人蜂擁入。視之。乃排愛區牛公司之總理戈利猗。與其任事者多人。而成法官亦在其列焉。衆見楷達猗等已就縛。俱欣然曰。彼已就繫乎。甚善。我儕有良馬多頭。前時曾爲所盜。雖多方以迹之。終不得其巢穴之所在。未從破獲。使彼優游以至於今。庸詎知彼被繫之一日乎。尼卡忒曰。彼巢穴所在。我知之甚詳。諸君願往。我當先導。衆皆曰。善。惟素未識荆。請以姓氏見告。尼卡忒

未及啟口。特斐刺從旁代答曰。彼卽紐約著名大偵探尼卡忒是也。衆聆其言。肅然起敬。復與尼卡忒握手言歡。尼卡忒遂將至此之初意。暨後所遭各節。簡舉其詞。向衆略陳梗概。因謂曰。此時不能再羈於此矣。皮虎佛被幽石室。宜急赴救。且楷達猗黨羽尙多。當乘其不備。若迅雷之不及掩耳。一鼓禽之。諸君其願相從乎。衆皆曰。願甚。言畢。咸歡呼以從。爭先恐後。尼卡忒遂別特斐刺。乘馬前驅。率衆向楷達猗巢穴而去。

第十三章 匪衆成禽

皮虎佛經此大創。痛楚彌甚。且血流過多。左臂及足。幾有麻木不仁之勢。幸右臂完好。尙可舒展自如。遂舉槍狂擊。追者

頗多損傷。未敢遽逼。僵臥移時。痛始稍減。遂不免。又有復生之希望。匍匐而前。隱身於路旁之小圓石下。藉此石以自蔽。憑險以拒。所可幸者。則狙擊皮虎佛之人。此時已爲皮虎佛所槍斃。餘衆槍法甚劣。且畏皮虎佛之猛厲。咸懼怯不前。麥哥倫雖屢督衆衝至其側。皆爲皮虎佛所擊退。遂相持不下者久之。蓋皮虎佛目下所據之處。其形勢之勝。與前在途中時大異。左臨深淵。右則頑石高聳。峻嶒錯峙。祇空前面一線之路。與之對敵。非若前之無險足恃。四面受擊也。第左與右雖足自蔽。而匪黨蠶擁而來。衆寡懸殊。久必不敵。故形勢雖險。而其境地之危。已達極點。所幸尼卡忒諸人之援。行之漸近。而皮虎佛則絕不知之。亦惟死據此險。作困獸之鬪而已。

斯時尼卡忒與戈利禰等多數人。乘馬疾馳。正行間。隱聞槍聲隆隆。絡繹不絕。尼卡忒卽駐足傾耳聽之。頓悟曰。此必皮虎佛已在道中。與麥哥倫諸人對敵。我不可不急救之。適駐足之處。廣漠無垠。自此而南。約有一英里之遙。並無山溪之阻。因思何不將所從之人。分而爲二。己與戈利禰各率其半。分道而往。己則與所率之人。鼓行而前。與之對敵。戈利禰則率其餘衆。出間道以襲其後。則黨徒雖衆。不難一鼓成禽。而不虞其漏網矣。蓋料麥哥倫見己之來。知不可敵。必率衆遁歸巢穴。據險以拒。若任其退歸穴中。則此石室之險。車不方軌。馬不並行。以此亡命之衆。死據其間。攻之未可猝下。不如分途而進。乘其退歸之際。出而截之。使其進退都窮。前後受

敵。其獲勝易於反掌。計畫既定。卽分其衆爲二。以一半隸戈利辯。使率之從間道進。以出其後。以一半自率之。取正中大道。疾趨而前。此時匪黨愈聚愈衆。與皮虎佛遙遙相對。皮虎佛孤立無援。然亦毫無懼色。惟自辦一死而已。身倚石壁之上。右手握槍。左手納彈。且納且發。煙焰爲之蔽目。彈之所至。發無不中。如是者又相持二十分鐘。匪衆少怯。皮虎佛自念。據此險隘。雖得苟延片刻。但全憑一槍以衛身。而囊中所存槍彈。已屬寥寥。倘槍彈一盡。則徒手相搏。何以爲敵。此身必無幸矣。正思忖間。忽見有多數匪衆。乘馬力躍而前。冒死逕進。皮虎佛見之。知必不免。一時怒恨交迫。奮力躍起。惟願麥哥倫在前。與之挺身一決。同歸於盡。俄而衆馬奔集。瞬息已


近槍聲隨之而起。皮虎佛亦急掣槍自衛。盡力狂擊。彈落如雨。有中馬首者。亦有中馬足者。馬既負痛。卽返身大奔。四向衝突。匪黨猝不及避。雜然倒地。且有爲馬足所踐踏者。皮虎佛見其未能害人。先以自害。則又破愁爲笑。麥哥倫見之。不覺怒甚。遂將身一躍。乘於馬背。加鞭更進。餘人見麥哥倫奮怒。亦蠶擁隨之。爭先恐後。斯時皮虎佛別無他術。所恃者惟一槍耳。雖將前驅者擊死二人。而諸人之勇往直前。仍不稍減。皮虎佛彈已用罄。祇剩一空槍在握。莫可抵禦。於是急將槍擲去。拔刀在手。計惟有肉薄而前。與決一死而已。方欲躍身外出。忽聞背後衆馬奔赴之聲。如風而至。自念此必楷達翻諸人來矣。心中一急。手足益無所措。正在閉目待斃之際。

不謂此多數之人衆。瞬息已到。且走且呼。逕越皮虎佛之前。向麥哥倫諸人撲去。槍聲疊起。絕而復續。急開目一視。不覺大喜。蓋來者非他。卽尼卡忒諸人也。麥哥倫見尼卡忒等迎面大至。知勢不敵。果不出尼卡忒所料。反身向巢穴而遁。未及數武。戈利辯已偕成法官。並率排愛區牛公司內諸人。從間道而出。截其去路。乘勢夾攻。皮虎佛觀此情形。連舉帽以招其衆。不勝大快。遂從旁作壁上觀。未幾。麥哥倫同黨諸人。強半皆爲擊斃。其不死者。則亦束手就縛。無能或免。麥哥倫亦受重傷。倚於石壁。屹然不動。尼卡忒行近其旁。謂之曰。麥哥倫乎。汝我相爭。已成結果。楷達辯被執於隆道。薩板喬亦就死矣。吾已得的實之證據。將控汝以行賄求舉之事。罪卽

不至於死。恐難免終身監禁耳。麥哥倫聞言。垂首至胸。哀聲言曰。請汝以水飲我。尼卡忒觀之。反有不忍之意。因卽取水飲之。隨俯首鵠立於其側。忽聞皮虎佛駭呼曰。速作隄防。聲未絕。猛舉首見光耀射目。白刃已將及體。急閃身一躍。始避過其鋒。蓋當時麥哥倫飲水之後。心忽清醒。猛取刀向尼卡忒力斫。口中自語曰。汝欲陷我乎。我與汝俱死。其鋒將及尼卡忒之身。非皮虎佛之報告。身幾不免。正欲舉槍報之。忽聞砉然一聲。一彈如飛而至。已將麥哥倫擊倒。旋見皮虎佛擲槍以還其衆。蹶躄而前。謂尼卡忒曰。本欲擊其要害。卽置之死。因君欲其苟活。庶可解送公堂。治以應得之罪。我敢以生者獻。尼卡忒欣喜異常。握皮虎佛之手。致謝畢。向衆言曰。諸

君乎。此事今日已成結果。雖曰傲天之幸。獲告成功。然亦仗諸君之力。同心協助。以至於此也。諸君誠不愧爲西方之美人。此後惟望再得相聚。衆人聞言。一時皆未作答。皮虎佛代答曰。數年巨患。除之一旦。君乃可稱我美極偉大之人物。歪俄明省隆道村諸人。莫名感謝。言訖。遂各馳歸隆道。握手而別。尼卡忒將楷麥二人。送入醫院。爲治其創。已則赴公堂控告。其後果治二人以永禁之罪。而尼卡忒則仍優游於世界中也。

丁未年四月初版
中華民國十二年七月六版



(狡兔窟一册)

(每册定價大洋壹角伍分)

(外埠酌加運費匯費)

譯述者 商務印書館編譯所

發行者 商務印書館

印刷所 上海北河南路北首寶山路 商務印書館

總發行所 上海棋盤街中市 商務印書館

分售處 北京天津保定奉天吉林龍江
濟南太原開封鄭州西安南京
杭州蘭谿安慶蕪湖南昌漢口
商務印書館分館

長沙常德衡州成都重慶瀘縣
福州廣州潮州香港梧州雲南
貴陽張家口新嘉坡

一四六丁

